

medicendis; violaceus autem adhibetur congrue in benedictione conjuncta cum exorcismis ad effugandos dæmones, unde ad aquam benedicendam eo colore utimur. Potest tamen adhiberi stola coloris temporari convenientis; ut dicitur in *Rubricis Ritualis Romani*.

5. Stando semper benedicat Sacerdos, aperto capite manibusque junctis, nisi cum ipsis liber sit tenendus.

6. In principio cujusque benedictionis dicat: *v. Adjutorium nostrum in nomine Domini. R. Qui fecit cælum et terram. v. Domine, exaudi orationem meam. R. Et clamor meus ad te veniat. v. Dominus vobiscum. R. Et cum spiritu tuo*, et attente, reverenter ac devote legat benedictionis verba.

7. Deinde dicatur oratio propria, una, vel plures, prout suo loco notatum fuerit; manumque formetur Crucis signum, ubi est nota hæc ✠.

8. Postea aqua benedicta rem aspergat in fine ter, hoc est in medio, à dextris, et à sinistris; et ubi notatum fuerit, pariter incenset, nihil dicendo.

TITULUS I.

Benedictiones quæ in hoc titulo I continentur fieri possunt à quolibet simplici Sacerdote.

ORDO AD FACIENDAM AQUAM BENEDICTAM.

Diebus Dominicis, et quodcumque Opus fuerit, præparato sale et aqua munda benedicenda in Ecclesia, vel Saceristia, Sacerdos superpellicio et stola violacea indutus, primo dicit:

V. Adjutorium nostrum in nomine Domini.

R. Qui fecit cælum et terram.

Deinde absolute incipit Exorcismum salis.

Exorcizo te creatura salis, per Deum ✠ vivum, per Deum ✠ verum, per Deum ✠ sanctum, per Deum, qui te per Eliseum Prophétam in aquam mitti jussit, ut sanaretur sterilitas aquæ: ut efficiaris sal exorcizatum in salutem

credentium: et sis ómnibus suméntibus te sánitas ánimæ et córporis; et effúgiat, atque discédat a loco, in quo aspérsus fúeris, omnis phantásia, et nequítia, vel versútia diabólicæ fraudis, ómnisque spíritus immúndus, adjurátus per eum, qui ventúrus est judicáre vivos et mórtuos, et sæculum per ignem. **R.** Amen.

Orémus.

Imménsam eleméntiam tuam, omnípotens ætérne Deus, humfliter implóramus, ut hanc creatúram salis, quam in usum géneris humáni tribuísti, benedícere, et sancti ficáre tua pietáte dignéris: ut sit ómnibus suméntibus salus mentis et córporis; et quidquid ex eo tactum, vel respérsus fúerit, cáreat omni immundítia, ómnique impugnatione spirituális nequitiæ. Per Dóminum nostrum.

Exorcismus aquæ, et dicitur absolute.

Exorcízo te creatúra aquæ, in nómine Dei Patris ✠ omnípoténtis, in nómine Jesu ✠ Christi Fílii ejus, Dómini nostri, et in virtúte Spíritus ✠ Sancti: ut fias aqua exorcízata ad effugándam omnem potestátem inimíci; et ipsum inimicum eradicáre et explantáre váleas cum ángelis suis apostáticis: per virtútem ejúsdem Dómini nostri Jesu Christi, qui ventúrus est judicáre vivos et mórtuos, et sæculum per ignem.

R. Amen.

Orémus.

Deus qui ad salutem humáni géneris, máxima quæque sacraménta in aquárum substántia condidísti: adésto propítius invocatióibus nostris, et eleménto huic multámodis purificationibus preparáto, virtútem tuæ benedicti ónis infúnde; ut creatúra tua, mystériis tuis sérviens, ad abigéndos dæmones, morbósque pelléndos divínæ grátie sumat effectum, ut quidquid in dómibus, vel in locis fidélium, hæc unda

resperserit, cæreat omni immunditia, liberetur a noxa: non illic resideat spiritus pestilens, non aura corrumpens: discédant omnes insidiæ laténtis inimici; et si quid est, quod aut incolumitati habitantium invidet, aut quieti, aspersione hujus aquæ effugiat, atque discédat; ut salubritas per invocatióem sancti tui nóminis expetita, ab ómnibus sit impugnationibus defénsa. Per Dóminum nostrum.

Hic mittit sal in aquam in modum crucis, dicendo semel:

Commixtio salis et aquæ páriter fiat in nómine Pa \times tris, et Fí \times lii, et Spíritus \times Sancti. Amen.

V. Dóminus vobiscum.

R. Et cum spiritu tuo.

Orémus.

Deus, invictæ virtútis auctor, et insuperabilis impérii Rex, ac semper magnificus triumphátor: qui adversæ dominationis vires réprimis, qui inimici rugiéntis sævitiam súperas: qui hostiles nequítias poténter expúgnas: te, Dó-

mine, treméntes et súpplices deprecámur, ac pétimus, ut hanc creatúram salis et aquæ dignánter aspicias, benignus illústres, pietátis tuæ rore sanctífices; ut ubicúmque fuerit aspérsa, per invocatióem sancti tui Nóminis, omnis infestatio immúdi spíritus abigátur, terrórque venenósi serpéntis procul pellátur, et præsentia Sancti Spíritus nobis misericórdiam tuam poscéntibus, ubique adesse dignétur. Per Dóminum, in unitate ejúsdem Spíritus Sancti Deus, per ómnia sæcula sæculórum. R. Amen.

BENEDICTIO AD OMNIA.

Adhiberi potest a quovis Sacerdote pro ómnibus rébus, de quibus specialis benedictio non habetur in Rit. Rom.

V. Adjutórium, etc.

R. Qui fecit, etc.

V. Dóminus vobiscum.

R. Et cum spiritu tuo.

Orémus.

Deus, cujus verbo sanctificántur ómnia, benedictiõem tuam effúnde super

creatúram istam (vel creatúras istas):
et præsta, ut quisquis ea (vel eis) se-
cundum legem et voluntátem tuam
cum gratiárum actióne usus fúerit, per
invocatiónem sanctíssimi Nómínis tui,
córporis sanitatem, et ánimæ tutelám,
te auctóre, percípiat. Per Chr. Dnm
nostr. *R. Amen.*

Deinde illam (vel illas) Sacerdos as-
pergit aqua benedicta.

BENEDICTIO LOCI.

- V.* Adjutórium, etc.
R. Qui fecit, etc.
V. Dómine, exáudi, etc.
R. Et clamor meus, etc.
V. Dóminus vobíscum.
R. Et cum spírítu tuo.

O rémus.

Benedic **†**Dómine, Deus omnípo-
tens, locum istum (vel domum ist-
tam): ut sit in eo (vel in ea) sánitas
cástitas, victória, virtus, humilitas, bó-
nitas, et mansuetúdo plenitúdo legis,

et gratiárum áctio Deo Patri, et Filio,
et Spírítui Sancto; et hæc benedictio
máneat super hunc locum (vel super
hanc domum) et super habitántes in
eo (vel in ea) nunc et semper.

R. Amen.

Et aspergat aqua benedicta.

BENEDICTIO DOMORUM
in sabbato S. paschæ.

Parochus, seu alius Sacerdos, super-
pelliceo et stola alba indutus, cum
ministro deferente vas aqua ex bene-
dictione Pontium ante perfusionem
Chrismatis acceptæ, visitat domos suite
parochiæ, aspergens eas eadem aqua
benedicta.

Ingrédiens domum dicit: Pax huic
dómui, et ómnibus habitántibus in ea.

Deinde aspergens loca præcipua do-
mus, et eos qui habitant in ea, dicit
Antiphonam:

Vidi aquam egrediéntem de templo
a látere dextro, allelúja: et omnes, ad

quos pervénit aqua ista, salvi facti sunt, et dicent: allelúja. allelúja.

Psalmus. Confitémini Dómino, quóniam bonus: quóniam in sæculum misericórdia ejus.

V. Glória Patri, etc.

Repetitur Antiphona: Vidi aquam etc.

Deinde dicit:

V. Osténde nobis, Dómine, misericórdiam tuam, allelúja.

R. Et salutáre tuum da nobis, allelúja.

V. Dómine, exaúdi, etc.

R. Et clamor meus, etc.

V. Dóminus vobiscum,

R. Et cum spíríta tuo.

Orémus.

Ixaúdi nos, Dómine sancte, Pater omnipotens, ætérne Deus: et sicut domos Hebræorum in éxitu de Ægypto, agni sángine líntas (quod pascha nostrum, in quo immolátus est Christus, figurábat), ab Angelo percutiénte cus-

todísti; ita mittere dignéris sanctum Angelum tuum de cœlis, qui custódiat, fóveat, prótegat, vísitet, atque deféndat omnes habitántes in hoc habitáculo. Per eúmdem Christum Dóminum nostrum. *R.* Amen.

ALIA BENED. DOMORUM
alio tempore facienda
cum aspersione aquæ benedictæ.

Parochus, seu alii Sacerdotes volentes aliquam particularem domum, vel generaliter domos fidelium alio tempore infra annum aspergere aqua benedicta, ingredientes domum dicant: Pax huic dómui, et ómnibus habitántibus in ea.

Deinde loca aspergendo, dicant Antiphonam: Aspérges me, Dómine, hysópo, et mundábor: lavábis me, et super nivem dealbábor.

Psalmus. Miserére mei, Deus, scúndum magnam misericórdiam tuam.

V. Glória Patri, etc.

Et repetitur Antiph.: Aspérges me, etc.

V. Dómine, exaúdi, etc.

34 BENEDICTIO DOMUS NOVÆ.

R. Et clamor meus, etc.

V. Dóminus vobiscum.

R. Et cum spíritu tuo.

O rémus.

Ixaúdi nos, Dómine sancte, Pater omnipotens, ætérne Deus: et mittere dignéris sanctum Angelum tuum de cælis, qui custódiat, fóveat, prótegat, visitet, atque deféndat omnes habitántes in hoc habitáculo. Per Christum Dnm. nostrum. **B.** Amen.

Deinde aspergat aqua benedicta.

BENEDICTIO DOMUS
NOVÆ.

V. Adjutórium, etc.

R. Qui fecit, etc.

V. Dóminus vobiscum.

R. Et cum spíritu tuo.

O rémus.

Te Deum Patrem omnipoténtem suppliciter exorámus pro hac domo, et habitatóribus ejus, ac rebus: ut cam

BENEDICTIO THALAMI. 35

bene **✠**dicere, et sancti **✠**ficáre, ac bonis ómnibus ampliáre dignéris: tribue eis, Dómine, de rore cæli abundántiam, et de pinguédine terræ vitæ substántiam, et desidéria voti eórum ad efféctum tuæ miseratiónis perdúcas. Ad intróitum ergo nostrum bene **✠**dicere, et sancti **✠**ficáre dignéris hanc domum, sicut benedícere dignátus es domum Abraham, Isaac, et Jacob: et intra parietes domus istíus, Angeli tuæ lucis inhábitent; eámque, et ejus habitatóres custódiant. Per Christum Dóminum nostrum. **R.** Amen.

Deinde aspergat aqua benedicta.

BENEDICTIO THALAMI.

V. Adjutórium, etc.

R. Qui fecit, etc.

V. Dóminus vobiscum.

R. Et cum spíritu tuo.

O rémus.

Benedic **✠**, Dómine, thálamum hunc: et ómnes habitántes in eo, in tua pa-

ce consistant, et in tua voluntate permanéant, et senéscant, et multiplicéntur in longitudínem diérum, et ad regna celórum pervéniant. Per Christum Dóminum nostrum. **R.** Amen.

Postea aspergat thálamum aqua benedicta.

**BENEDICTIO
DOMUS SCHOLARIS**

NOVITER ERRECTE.

Die Dominicali vel festivi, á Curato et Patrono constituta et rite promulgata, Officians et qui adsunt Sacerdotes et ministri, in domo parochiali vel, si in loco, ubi schola benedicenda sit, domus parochialis non fuerit, in aliqua alia decenti domo, paramenti coloris albi induti, omnibus bene paratis, hora statuta, precedente scholarum juventute cum vexillo suo, choro et Subdiacono cum Cruce, et sequente Patrono vel ejus commissario, cum reliquis fidelibus ad hanc solemnitatem in-

vitatis, bono ordine in solemní processione, sub pulsu campanarum et cantu Litaniarum ad omnes Sanctos vel piorum hymnorum, ex domo parochiali in Ecclesiam se conferunt, ubi Officians ad aram majorem, in infimo gradu genuflexus, tono consueto intonat sequentem Hymnum. Quod si vero Ecclesia nulla sit in loco, sequentia dicantur in domo, e qua egrediuntur.

Hymnus **Veni Créator Spíritus** (ut ad calcem libri) quem chorus prosequitur.

Hymno finito cantatur:

V. Kyrie eléison.

R. Christe eléison.

V. Kyrie eléison.

Pater noster. secreto.

V. Et ne nos indúcas in tentationem.

R. Sed libera nos a malo.

V. Dómine, exaúdi, etc.

R. Et clamor meus, etc.

V. Dóminus vobiscum.

R. Et cum spíritu tuo.

Oremus.

Deus, qui corda fidelium Sancti Spiritus illustratione docuisti: da nobis in eodem Spiritu recta sapere, et de ejus semper consolatione gaudere.

Deus, cui omne cor patet, et omnis voluntas loquitur, et quem nullum latet secretum: purifica per infusionem Sancti Spiritus cogitationes cordis nostri, ut hanc nostram benedictionem digne perficere, et tuis fidelibus perinde optatam salutem procurare valeamus.

Actiones nostras, quaesumus Domine, aspirando praeveni, et adjuvando prosequere: ut cuncta nostra oratio et operatio a te semper incipiat, et per te coepta finiatur. Per Dominum nostrum Jesum Christum Filium tuum: qui tecum vivit et regnat in unitate Spiritus Sancti Deus, per omnia saecula saeculorum. **R.** Amen.

V. Sinite parvulos venire ad me.

R. Talius est enim regnum caelorum.

Oremus.

Omnipotens sempiternus Deus, te suppliciter deprecamur, ut respicere digneris super infantulos tuos: infunde in corda eorum gratiam Spiritus Sancti; ut per eundem illuminati et edocti sciant, quid acceptum sit coram te omni tempore, et proficiant sapientia, aetate et gratia. Per Christum Dominum nostrum. **R.** Amen.

V. Adjutorium, etc.

R. Qui fecit, etc.

Diaronus.

V. Procedamus in pace.

R. In nomine Christe.

Amen.

Nota Officians in processione solemni, sub cantu scholaris juventutis et pulsu campanarum, vadit ad Scholam benedicendam. Quo cum pervenerit Officians, stans ante januam exteriorem, cantat solus:

V. Pax huic domui.

R. Et omnibus habitantibus in ea.
*Tunc intonat Antiphonam: Aspér-
 ges me. Et chorus prosequitur tono
 Psalmi:*

Dómine, hyssópo et mundábor: la-
 vábis me, et super nivem dealbábor.

Miserére mei, Deus: secúndum mag-
 nam misericórdiam tuam.

Gloría Patri, et Filio, et Spíritui
 Sancto.

Sicut erat in principio, et nunc et
 semper: et in sæcula sæculórum.
 Amen.

Deinde repetitur Ant. Aspér-
 ges me, Dómine, hyssópo, et mundábor: lavá-
 bis me, et super nivem dealbábor.

*Interim dum hæc cantantur, Offi-
 cians aspergit parietes exteriores sal-
 tem in anteriori parte aqua benedicta.*

His finitis, Officians cantat:

V. Dóminus vobíscum.

R. Et cum spíritu tuo.

O rémus.

Omnípotens et miséricors Deus, qui sa-
 cerdótibus tuis tantam præ cæteris

grátiam contulisti, ut quidquid in tuo
 nómine digne, perfectéque ab iis ági-
 tur, a te fieri credátur: quæsumus im-
 ménsam cleméntiam tuam, ut quid-
 quid modo visitatúri sumus, vísites, et
 quidquid benedictúri sumus, bene **✠**
 dícas, sitque ad nostræ humilitátis in-
 tróitum, Sanctórum tuórum méritis,
 fuga inimíci, Angeli pacis ingrèssus.

ómine sancte, Pater omnípotens, per
 intercessiónem sanctórum Ignátii et
 Aloisii béne **✠** dic domum istam, bé-
 ne **✠** dic intróitum nostrum, béne **✠**
 dic ingrèssum pedum nostrórum: sicut
 dignátus es domum Patriarchárum
 Abraham, Isaac, et Jacob benedícere.
 Per Christum Dóminum nostrum.

R. Amen.

*Nunc sequitur ingressus. Officians
 intrando anaplus Scholæ cubiculum,
 cantat:*

V. Pax huic dómui.

Chorus respondet:

R. Et omnibus habitantibus in ea.
Progrediens cum Clero et choro ad

mensam linteo albo tectam, in qua inter duos cereos accensos Crucifixi imago est posita, cantat:

V. Dómine, exaúdi, etc.

R. Et clamor meus, etc.

V. Dóminus vobiscum.

R. Et cum spíritu tuo.

Orémus.

Exáudi nos, Dómine sancte, Pater omnipotens, ætérne Deus: et mittere dignéris sanctum Angelum tuum de cœlis, qui custódiat, fóveat, próteget, vísitet, atque deféndat omnes habitántes, docéntes, et discéntes in hoc habitáculo. Per Christum Dnm nostrum.

R. Amen.

Orémus.

Dómine Jesu Christe, qui discípulis tuis dixisti: In quacúmque domum intravéritis, salutáte eam, dicéntes: Pax huic dómui; véniat quæsumus, pax illa super hanc domum, instituéndæ juventúti destinátam, et super om-

nes habitántes docéntes, et discéntes in ea; et eos, Dómine, ab omni infirmitáte erípere, et liberáre dignéris: reple docéntes in ea spíritu sciéntiæ, sapiéntiæ, et timóris tui; reple discéntes in ea grátia tua, ut, quæ salutáriter et utiliter edocéntur, intelléctu cápian, corde retíneant, ópere exsequántur, et in ómnibus nomen tuum honorificétur. Ad intróitum ergo nostrum bene **+** dicere, et sanctificáre dignéris hanc scholam, et intra parietes domus istíus Angeli tuæ lucis hábitent, eámque et in ea habitántes, docéntes et discéntes custódiant. Per Christum Dóminum nostrum. R. Amen.

Postea Officiarius intonet Antiphonam: Aspérget me, et chorus prosequitur, ut supra, pag. 40. Interim fit aspersione cubiculi aqua benedicta. Reversus ad mensam, Officiarius nupónit thuribulum, et benedicit illud, dicens:

Per intercessiónem sancti Michaélis Archángeli, stantis a dextris altáris incénsi, et ómnium sanctórum Angeló-

rum, incensum istud digneris, Dómine, bene- ✠ dicere, et in odórem suavitatis accipere. Per Christum Dóminum nostrum. **R.** Amen.

Hoc dicto, sumit Officiarius thuribulum, et incensat cubiculum, choro cantante tono Psalmi:

Incensum istud, a te benedictum, ascéndat ad te, Dómine: et descéndat super nos misericórdia tua.

Psalmus 140.

Dirigátur, Dómine, orátio mea, sicut incensum in conspéctu tuo: * elevátio mánuum meárum, sacrificium vespertinum.

Pone, Dómine, custódiam ori meo: * et óstium circumstántiæ lábiis meis.

Non declinet cor meum in verba malitiæ: * ad excusándas excusatiónes in peccátis.

Glória Patri, et Filio, * et Spiritui Sancto.

Sicut erat in princípio, et nunc et semper: * et in sæcula sæculórum. Amen.

Incensatione peracta, Officiarius stans coram imagine Crucifixi, cantat:

V. Dóminus vobíscum.

R. Et cum spíritu tuo.

Orémus.

Visita, quæsumus Dómine, habitatió- nem istam, et omnes insídias inimíci ab ea longe repelle: Angeli tui sancti hábitent in ea, qui omnes hic habitá- tes, docétes et discétes in pace cus- tódiant, et benedictio tua super illos sit semper.

Béne ✠ dic, Dómine, domum is- tam, et sit ibi sánitas, sánctitas, vir- tus et glória, humilitas, bónitas, mansuetúdo, lenitas, docilitas, et plenitúdo legis, obediéntia et gratiárum actio Deo Patri, et Filio, et Spíritui sancto. Et hæc benedictio sit super hanc domum et locum istum: atque super om- nes habitátes, docétes et discétes in eo descéndat septiformis grátia Spí- ritus Sancti. Per Christum Dóminum nostrum. **R.** Amen.

Officiarius tunc affigit sanctam Crucem in loco apto cultu; dicendo.

Signum salutis impone, Dómine, super hanc domum: et non permittas introfere in eam ángelum percutiéntem. In nómine Pa † tris, et Fí † li, et Spíritus † Sancti. *R.* Amen.

Versus Crucem:

Orémus.

Omnipotens, sempitérne Deus, qui in omni loco dominationis tuæ totus assistis, solus operáris: adesto supplicatióibus nostris, ut hujus domus sis protéctor, et nulla hic nequítia contráriæ potestátis obsístat; sed in virtúte sanctæ crucis et operatióne Spíritus Sancti fiat tibi hic purum servítium, et dovóta libértas exsístat. Per Christum Dóminum nostrum. *R.* Amen.

Orémus.

Adesto nobis, Dómine Deus noster: et eos qui in sanctæ crucis præsidio confidunt, perpétuis defénde auxiliis.

Per Christum Dóminum nostrum.

R. Amen.

Tandem benedicit Officiarius cultu et omnibus presentibus manū dexterae firmans signum crucis, et dicens.

Benedictio Dei omnipoténtis, Pa † tris, et Fí † li, et Spíritus † sancti, descéndat super hanc domum, super omnes habitántes, docéntes, et discéntes in ea, super nos omnes, et máneat semper. *R.* Amen.

Hæc finit sub cantu. Inventura et pulvis compatiuntur processionaliter reddens in Ecclesiam statuto oratorio, ubi celebratur Missa conveniens officio diei.

BENEDICTIO NOVÆ NAVIS.

V. Adjutórium, etc.

R. Qui fecit, etc.

V. Dóminus vobíscum.

R. Et cum spíritu tuo.

Orémus.

Propitiáre, Dómine, supplicatióibus nostris, et béne † dic navem istam

déxtera tua sancta, et omnes qui in ea vehéntur, sicut dignátus es benedicere arcam Noë ambulántem in dilúvio: pórrige eis, Dómine, déxteram tuam, sicut porrexisti beáto Petro ambulánti super mare; et mitte sanctum Angelum tuum de cœlis, qui liberet, et custódiat eam semper a periculis univér-sis, cum ómnibus quæ in ea erunt: et fámulos tuos, repúlsis adversitatibus, portu semper optábili, cursúque tranquillo tueáris, transáctisque, ac recte perféctis negótiis ómnibus, iteráto tēmpore ad própria cum omni gaudio revocáre dignéris. Qui vivis y regnas, etc. **R.** Amen.

Aspergat navim aqua benedicta.

**BENEDICTIO COMMUNIS SUPER
FRUGES ET VINEAS.**

V. Adjutórium, etc.
R. Qui fecit, etc.
V. Dómine, exáudi, etc.
R. Et clamor meus, etc.

V. Dóminus vobíscum.
R. Et cum spíritu tuo.

Orémus.

Orámus pietátem tuam, omnipotens Deus, ut has primítias creatúræ tuæ, quas áeris et plúviæ temperáméto nutrire dignátus es, benedictiónis tuæ imbre perfúndas, et fructus terræ tuæ usque ad maturitátem perdúcas. Tribue quoque pópulo tuo de tuis munéribus tibi semper grátias ágere; ut a fertilitáte terræ esuriéntium ánimas bonis ómnibus affluéntibus répleas, et egénus et pauper laudent nomen glóriæ tuæ. Per Christum Dnm nostrum. **R.** Amen.

Aspergat illas aqua benedicta.

**BENEDICTIO
AGNI PASCHALIS.**

V. Adjutórium, etc.
R. Qui fecit, etc.
V. Dóminus vobíscum.
R. Et cum spíritu tuo.

Orémus.

Deus, qui per famulum tuum Móysen, in liberatione populi tui de Ægipto, agnum occidi iussisti in similitudinem Domini nostri Jesu Christi, et utroque postes domorum de sanguine ejusdem agni perungi præcepisti: tu bene **✠** dicere, et sancti **✠** ficare digneris hanc creaturam carnis, quam nos famuli tui ad laudem tuam sumere desideramus, per resurrectionem ejusdem Domini nostri Jesu Christi: Qui tecum vivit et regnat in sæcula sæculorum.

R. Amen.

Et mox aspergat aqua benedicta.

BENEDICTIO OYORUM,

V. Adjutorium, etc.

R. Qui fecit, etc.

V. Dominus vobiscum.

R. Et cum spiritu tuo.

Orémus.

Subveniat, quæsumus Domine, tuæ benedictionis grátia, huic ovorum

creaturæ: ut cibus salúbris fiat fideibus tuis, in tuarum gratiarum actione suméntibus, ob resurrectionem Domini nostri Jesu Christi: Qui tecum vivit et regnat in sæcula sæculorum.

R. Amen.

Aspergatur aqua benedicta.

BENEDICTIO PANIS.

V. Adjutorium, etc.

R. Qui fecit, etc.

V. Dominus vobiscum.

R. Et cum spiritu tuo.

Orémus.

Domine sancte, Pater omnipotens, ætérne Deus, bene **✠** dicere digneris hunc panem tua sancta spirituáli benedictione: ut sit omnibus suméntibus salus mentis et córporis; atque contra omnes morbos, et univérsas inimicorum insídias tutámen. Per Dóminum nostrum Jesum Christum Filium tuum, panem vivum, qui de cælo descendit, et dat vitam et salutem mundo: et te

cum vivit et regnat in unitate Spiritus Sancti Deus, per omnia secula seculorum. **R.** Amen.

Aspergatur aqua benedicta.

BENEDICTIO

NOVORUM FRUCTUUM

V. Adjutorium, etc.

R. Qui fecit, etc.

V. Dominus vobiscum.

R. Et cum spiritu tuo.

Oremus.

Benedic **+** Domine hos novos fructus **B.N.**, et presta: ut qui ex eis in tuo sancto nomine vescuntur, corporis et animae salute potiuntur. Per Christum omnium nostrum. **R.** Amen.

Et aspergantur aqua benedicta

BENEDICTIO

OLEI SIMPLICIS.

V. Adjutorium, etc.

R. Qui fecit, etc.

Exorcismus.

Exorcizo te creatura olei per Deum Patrem **+** omnipotentem, qui fecit caelum et terram, mare, et omnia, quae in eis sunt. Omnis virtus adversarii, omnis exercitus diaboli, et omnis incurtus, omne phantasma satanae eradicare, et effugare ab hac creatura olei, ut fiat omnibus, qui eo usuri sunt, salus mentis et corporis, in nomine Dei Patris **+** omnipotentis, et Jesu **+** Christi Filii ejus Domini nostri, et Spiritus **+** Sancti Paraclite, et in caritate ejusdem Domini nostri Jesu Christi, qui venturus est judicare vivos et mortuos, et saeculum per ignem. **R.** Amen.

V. Domine, exaudi, etc.

R. Et clamor meus, etc.

V. Dominus vobiscum.

R. Et cum spiritu tuo.

Oremus.

Domine Deus omnipotens, cui adstat exercitus Angelorum cum tremore, quorum servitium spirituale cognosci-

tur, dignare respicere, benedí ✠ cere, et sancti ✠ ficare hanc creaturam olei, quam ex olivárum succo eduxísti, et ex eo infirmos iníngi mandásti, quátenus sanitate percépta, tibi Deo vivo et vero grátias ágerent: præsta, quæsumus; ut hi, qui hoc oleo, quod in tuo nómine bene ✠ dicimus, usi fuerint, ab omni languóre, omnique infirmitate, atque cunctis insídiis inimíci liberéntur, et cunctæ adversitatés separéntur a plásmate tuo, quod pretiósó sánguine Fílii tui redemísti, ut numquam lædátur a morsu antiqui serpéntis. Per eúndem Dóminum nostrum Jesum Christum Fílium tuum: qui tecum vivit et regnat in unitate Spíritus Sancti Deus, per ómnia sæcula sæculórum.

R. Amen.

Aspergat oleum aqua benedicta.

BENEDICTIO AD
QUODCUMQUE COMESTIBILE

V. Adjutórium, etc.

R. Qui fecit, etc.

V. Dóminus vobíscum.
R. Et cum spíritu tuo.

O rémus.

Benedic ✠ Dómine creaturam istam **N**, ut sit remédium salutáre géneri humano: et præsta per invocatiónem sancti Nóminis tui, ut quicúmque ex ea sumpserint, córporis sanitátem, et animæ tutelám percípiant. Per Christum Dum nostrum. R. Amen.

Aspergat aqua benedicta.

BENEDICTIO VINI.

IN FESTO S. JOANNIS EVANGELISTÆ.

In festo sancti Joannis Evangelistæ, expleta omnino Missa majore, hoc est post ultimun Evangelium, retentis omnibus paramentis, excepto manipulo, vinum a populo oblatum, in memoriam et honorem. S. Joannis, qui venenum innocue sumpsit, benedicitur hoc modo.

V. Adjutórium, etc.

R. Qui fecit, etc.

007492

V. Dómine exaúdi, etc.

R. Et clamor meus, etc.

V. Dóminus vobiscum.

R. Et cum spíritu tuo.

Orémus.

Bene ✠ dicere et conse ✠ crare digneris, Dómine Deus, dextera tua hunc cálicem vini, et cuiuslibet potus: et præsta; ut per mérita sancti Joánnis Apóstoli et Evangelístæ, omnes in te credentes et de cálice isto bibentes benedicantur, et protegántur. Et sicut beátus Joánnes de cálice bibens venenum, illæsus omnino permansit, ita omnes, hac die in honórem beáti Joánnis de cálice isto bibentes, méritis ipsius ab omni ægritudine veneni, et nóxiis quibusvis absolvántur, et corpore ac ánima se offerentes, ab omni culpa liberéntur. Per Christum Dnm nostrum. R. Amen.

Béne ✠ dic, Dómine, hanc creaturam potus: ut sit remédium salutáre omnibus suméntibus: et præsta per invocatiónem sancti nóminis tui; ut qui-

cúmque ex eo gustáverint, tam animæ quam corpóris sanitátem, te donánte, percipiant. Per Christum Dóminum nostrum. R. Amen.

Concludendo:

Et benedictio Dei omnipoténtis, Patris, et Filii, et Spíritus Sancti, descéndat super hanc creaturam vini, et cuiuslibet potus, et máneat semper. Amen.

Postremo aqua benedicta aspergat.

¶ Quod si benedictio illa fiat privatim extra Missam, Sacerdos, superpelliceo et stola indutus, eam conficiat modo superius tradito.

BENEDICTIO

AURY, MYRRHÆ ET THURIS

IN DIE EPIPHANIÆ.

V. Adjutórium, etc.

R. Qui fecit, etc.

V. Dóminus vobiscum.

R. Et cum spíritu tuo.

O rémus.

Suscipe, sancte Pater, a me indigno fámulò tuo hæc múnèra, quæ in honorem Nómìnis tui sancti, et in títulum omnipoténtiæ tuæ majestátis, humiliter tibi offero; sicut suscepisti sacrificium Abel justì, et sicut eadem múnèra a tribus Magis tibi quondam offeréntibus suscepisti.

Exorcizo te, creatúra auri, myrrhæ et thuris, per Patrem ✠ omnipoténtem, per Jesum Christum ✠ Fílium ejus unigénitum, et per Spíritum sanctum ✠ Paráclitum: ut a te discédât omnis fraus, dolus, et nequítia diaboli, et sis remédium salutáre humáno géneri contra insidias inimíci; et quicumque divino freti auxílio te in suis lóculis, dómibus, aut circa se habúerint, per virtútem et mérita Dómini et Salvatóris nóstri, ac intercessiónem ejus sanctíssimæ Genitricis et Virgínis Mariæ, ac eórum, qui hódie similibus munéribus Christum Dóminum veneráti sunt, omniúmque Sanctórum, ab

ómnibus perículis ánimæ et córporis liberéntur, et bonis ómnibus pérfrui mereántur.

R. Amén.

Deus invisibilis et interminábilis, pietátem tuam, per sanctum et treméndum Fílii tui nomen, suppliciter deprecámur: ut in hanc creatúram auri, thuris, myrrhæ bene ✠ dictionem ac operatiónem tuæ virtútis infúndas: ut qui ea penes se habúerint, ab omni ægrítudinis et læsiónis incúrsu tuti sint, et omnes morbos córporis et ánimæ effúgiant; nullum dominétur eis periculum, et læti, ac incólumes tibi in Ecclésia tua desérvant: qui in Trinitáte perfécta vivis et regnas Deus per ómnia sæcula sæculórum. R. Amén.

Postea aspergantur aqua benedicta.

Et benedictio Dei omnipoténtis, Patris, et Fí ✠ lii, et Spíritus ✠ Sancti, descéndat super hanc creatúram auri, thuris et myrrhæ, et máneat semper. R. Amén.

BENEDICTIO CRETÆ

IN FESTO EPIPHANIÆ.

Réne ✠ die, Dómine Deus, creatúram istam cretæ: ut sit salutáris humano géneri; et præsta per invocatiónem Nómínis tui sanctíssimi, ut quicúmque ex ea sumpserint, vel in ea in domus suæ portis scripserint nómína sanctorum tuórum Gaspári, Melchióris et Baltássar, per eórum intercessiÓnem et mérita, córporis sanitátem et animæ tutelam percípiant. Per Christum Dóminum nostrum. **R.** Amén.

Aspergatur aqua benedicta.

BENEDICTIO DOMORUM

IN FESTO EPIPHANIÆ.

In ingressus:

V. Pax huic dómni.**R.** Et ómnibus habitántibus in ea.

Antiphona. Ab Oriénte venérunt Magi in Bétlehem, adoráre Dóminum: et apértis thesauris suis pretiósá múnera obtulérunt, aurum Regi magno, thus vero, myrrham sepultúræ ejus. Allelúja.

BENEDICTIO DOMORUM. 61

Canticum B. Mariæ **V.** Magnificat
(ut ad calcem libri.)

Interea aspergitur, et incensatur domus, et in fine repetitur **Antiph.** Ab Oriénte venérunt, etc.

Pater noster. **secreto.****V.** Et ne nos indúcas in tentatiÓnem.**R.** Sed líbera nos a malo.**V.** Omnes de Saba vénient.**R.** Aurum et thus deferéntes.**V.** Dómine, exaúdi, etc.**R.** Et clamor meus, etc.**V.** Dóminus vobíscum.**R.** Et cum spírítu tuo.**O** rémus.

Deus, qui hodiérna die Unigénitum tuum géntibus stella duce revelásti: concéde propítius; ut qui jam te ex fide cognóvimus, usque ad contemplándam spéciem tuæ celsitudinis perdúcámur. Per eúndem Dóminum nostrum Jesum Christum Fílium tuum: qui tecum vivit et regnat in unitáte

Spiritus Sancti Deus, per omnia saecula saeculorum. R. Amén.

Responsorium. Illuminare, illuminare Jerúsalem, quia venit lux tua: et glória Dómini super te orta est, Jesus Christus ex Maria Virgine.

V. Et ambulábunt gentes in lumine tuo: et reges in splendóre ortus tui.

R. Et glória Dómini super te orta est.

Orémus.

Pene **✠** dic, Dómine Deus omnipotens, locum istum [vel domum istam] : sicut sit in eo [vel in ea] sánitas, cástitas, victória virtus, humilitas, bónitas et mansuetúdo, plenitúdo legis, et gratiarum actio Deo Patri, et Filio, et Spirítui Sancto; et hæc benedictio maneat super hunc locum [vel super hanc domum], et super habitátes in eo [vel in ea]. Per Christum Dóminum nostrum. R. Amén.

BENEDICTIO CANDELARUM

IN FESTO S. BLASII EP. ET MART.

V. Adjutórium, etc.

R. Qui fecit, etc.

V. Dómine, exaúdi, etc.

R. Et clamor meus, etc.

V. Dóminus vobíscum.

R. Et cum spirítu tuo.

Orémus.

Omnípotens et mitíssime Deus, qui ómnium mundi rerum diversitatés solo Verbo creásti, et ad hóminum reformatiónem illud idem Verbum, per quod facta sunt ómnia, incarnári voluísti: qui magnus es, et imménsus, terríbilis atque laudábilis, ac fáciens mirabilia: pro cuius fidei confessióne gloriósus Martyr et Póntifex Blásius, diversórum tormentórum génera non pavéscens, martyrii palmam feliciter est adéptus: quique eidem, inter céteras grátias, hanc prerogativam contulísti, ut quoscúmque gútturis morbos tua virtúte curáret; magestátem tuam